

Il Lag Salischnas duei esser realisau sil 2027


Il venderdis vargau ha l'Uniu Lag Salischnas salvau sia radunonza generala ed elegiu il niev president Diego Deplazes da Rabiun. Il project Lag Salischnas vegn da niev integras ell'organisaziun dalla vischnaunca Sumvitg ed il TCS vul collaborar.

SUSI ROTHMUND/FMR

Dapi la fundaziun il 2017 era l'Uniu Lag Salischnas vegnida presidiada da *Rino Caduff* da Glion. Ord motivs persunals ha el abdicau avon dus onns, aschia ch'el consuprastont *Fabian Collenberg* ha tgamunau quella ils davos onns ed era menau la radunonza generala. Il venderdis ei il deputau e secretari general dalla Lia Rumantscha, *Diego Deplazes* vegnius elegius sco president dall'Uniu Lag Salischnas. Ils ulteriurs consuprastonts *Andreas Baselgia*, *Luis Beer*, *Fabian Collenberg*, *Curdin Maissen*, *Andy Monn*, *Jacqueline Walter*, *Placi Wenzin* e *Guido Wieland* ein vegni reelegi cun in applaus. Ils revisurs dall'uniun *Claudio Cajacob* e *Willy Decurtins* ein medemamein vegni reelegi. L'uniun dumbra rodund 800 commembras e commembres, per gronda part dalla regiun. Il project duei vegnir integras ell'organisaziun dalla vischnaunca Sumvitg. Ina cumissiun communal duei perssequitar ed accompagnar vinavon il project. La cumissiun duei ensamen cun in menader da project tecnic ed in menader da project per l'economia da menaschi promover il project Salischnas.

Sin buna via

Sco *Fabian Collenberg* ha declarau, ei la realisaziun dil project Lag Salischnas sin buna via: «Tecnicamein ei il lag realisabels ed era culla finanziaziun es-san nus sin buna via. Ina gronda domanda aviarta ei denton aunc la cumpensaziun da terren.» Sco l'uniun scriva en in communicau als mieds da massa, ei ina grupp da lavur en stretg contact culs cultivaders per elaborar sli-giaziuns. Ei vegn sclariu puseiveladads da



L'Uniu Lag Salischnas spera da saver realisar il project Lag Salischnas sin il 2027.

FOTO MAD

cumpensaziun da terren, indrezs da schuar e puseiveladads cuagl agroturistem. L'uniun quenta da saver entscheiver cullas lavurs da baghegiar il 2025. La fasa da baghegiar dil project vegn a cuzzar rodund dus onns aschia ch'ei po forsa vegniu fatg bogn a Salischnas igl onn 2027.

17 milliuns per lag e campadi

Las examinaziuns tecnicas confirman la realisabladad dil project a Salischnas. Per la realisaziun dil Lag Salischnas quenta l'uniun cun cuosts da rodund 12 milliuns francs. Tenor *Fabian Collenberg* vegn il maun public proba-

blamein a surprener ils cuosts pil lag. Per realisar il campadi cun glamping (campar a moda luxuriosa), ein cuosts da rodund tshun milliuns francs previ. Cheu vul l'uniun tshercar investurs. Cun il TCS eis ei reussiu d'anflar in gestiunari e co-investur pil campadi/glamping. *Oliver Grütznér*, menader

Project Lag Salischnas

L'Uniu Lag Salischnas vul realisar a Salischnas ella vischnaunca da Sumvitg ina zona da sport e recreaziun. Il project cunteng in lag natural da far bogn, in lag da pesca ed ina tratga da peschs. Il territori cunfinescha al perimeter da revitalisaziun dall'ogna A-31 a Cahuons ch'ei da muntada nazionala. Plinavon sesanfla sil territori ina deponia veglia che savess vegnir dimessa en connex cul project. L'idea per in lag natural da far bogn a Salischnas ei gia naschida igl onn 1997. Igl onn 2013 ei l'idea vegnida sviluppada vinavon entras ina grupp d'interess. Il project Salischnas sustegn las intenziuns dalla Surselva da promover il turissem da stad ch'ei in entras la midada dil clima indispensablas. Igl Uffeci per la natira ed igl ambient ha constatua che la realisaziun d'ina zona da sport e recreaziun includ lag natural da far bogn e revitalisaziun dil Rein Anterior seigi interessanta. La vischnaunca da Sumvitg ha ina posiziun positiva envers il project, sustegn la revitalisaziun dil Rein denton mo sche la zona da sport e recreaziun sa vegnir realisada.

der dalla partiziun turissem e temps liber, ha partiu entgins patrats cun la radunonza. El seigi perschaduis ch'ei sappi vegnir creau a Salischnas in project unic. Il TCS vegn consequentamein a separticipar finanziaimein vid il project gia naven dalla proxima fasa da project.

PUNTREIS vul ir vias novas cull'ustria

Il venderdis sera ha *Fatmir Spescha* – il cuschnier dalla casa PUNTREIS a Mustér – envidau alla vernissascha da siu cudisch da cuschniar «Tratgas indigenas en niev vestgiu». *Gian Reto Nufer*, il menader dalla casa, ha tradiu da vuler arver pli fetg la gastronomia dalla casa per la publicitad.

SUSI ROTHMUND/FMR

Las fatschas dils hospes dalla casa PUNTREIS e dil cuschnier *Fatmir Spescha* han adina puppei tradiu il venderdis, ch'ei eran surpri e cuntents cun quei ch'ei vegniu surviu. Oravontut ils «Raviolis da capuns» han fascinau las buccas finas (La FMR ha presentau il cudisch la mesjanna vargada).

Il cuschnier drova sfidas

Gia ussa ein hospes d'ordeifer beivnegni ell'ustria dalla casa PUNTREIS che porscha era catering e menus per fiestas da famiglia, nozzas ed auter. Sco *Gian Reto Nufer* ha tradiu il venderdis, pupprogna *Fatmir Spescha* las cussadentas ed ils cussadents cun sia cuschnia. El drovi denton ina sfida speciala. «Perquei lein nus arver aunc pli fetg noss'ustria e porscher

ina gastronomia d'events», aschia il menader dalla casa PUNTREIS. L'idea seigi tuttavia buca quella da concurrenzar ils menaschis ella regiun, moibein d'offerir entzagai spezial. «Jeu less porscher delets gastronomics ed inscengar quels a moda speciala. Quei sa esser cun preparar el liug, cuschniar ordaviert sil figug ni era cun survir en vischala nunusitada ed autras surprasas», declara *Fatmir Spescha* che ha per exempel surviu ina suppa da zetgas en crosas dad ovs.

Tut dalla regiun e fatg en casa

Products fini han piars nuot ella cuschnia dalla casa PUNTREIS. *Fatmir Spescha* fa tut quei ch'ei puseivel sez, naven dil paun e la tuargia entochen tier la pasta ed il bouillon. Ils animals cumpra el da purs dalla regiun. «Pil solit viscotel jeu ils purs ed enquerel ora ils animals aschia ch'jeu encouschel els avon ch'ei vegnan ella cazzetta», di il cuschnier che ha gia cuschniau en pliras ustrias e hotels da renum, il davos en Val sogn Pieder. Regional e stagional ha per el ina gronda muntada. Impurtont ei senza dubi era ch'el fa sia lavur cun bia cor, perschasiun e pissiun e quellas ingredienzas drov'ei probablaimein era per cuschniar ils recepts ch'ei d'anflar en siu cudisch. Autruissa vegn ei strusch a gartegiar.

Il cudisch «Tratgas indigenas en niev vestgiu/Einheimische Gerichte anders präsentiert» cuntegn 30 recepts naven da raviolis da capuns tachen egle bov da Denis. Il cudisch ei cumparius tier «ediziuun rein» ISBN 978-3-033-08785-9. El po vegnir cumpraus ella casa PUNTREIS ni directamein tier igl autur dil cudisch: Tel. 078 842 23 60 ni per mail: fspescha@PUNTREIS.ch. Il cudisch cuosta 30 francs.



A caschun dalla vernissascha da siu cudisch da cuschniar ha *Fatmir Spescha* puppergnau ils envidai cun sias surprasas culinarias e la presentaziun da quellas.

US SCHLUEIN GLION

Thomas Müller ei niev president

Sper la tractaziun dallas fatschentas statutaricas ha la radunonza generala dall'Uniu sportiva Schluein Glion (USSI) era elegiu in niev president. Unanimamein ei *Thomas Müller* vegnius tsharnius sco successur da *Vendelin Cabernard*. Lez ei se-retrats da siu uffeci suenter quater onns. *Thomas Müller* habitescha a Flem Casa d'uaul, ei giurist promoviu ed advocat. In fegl dad el dat ballapei tiels juniors dall'USSI. En sia giuventetgna ha el dau cunzun ballamaun (ligia nazionala A cun Yellow Winterthur), ei denton era staus activs sco ballapeist tiel SC Wipkingen. Sco sportist passionau ei *Thomas Müller* zun motivaus d'astgar surprender il tgamun dall'USSI e menar quella cun success egl avegnir. 2(cdm/fmr)

CURAGLIA



Igl auto ei cupitgaus sur la via ora.

FOTO POLIZIA CANTUNALA

Giuvn da 17 onns va sur igl ur da via ora

La sonda endamaun hai dau in accident silla via d'uaul a Staggias sur Curaglia. In giuvn da 17 onns ei ius cun in vehichel agricol sur igl ur dalla via ora. Tenor la polizia seigi el vegnius blessaus gravamein. La Rega ha trasportau el dil Spital cantunala a Cuera. La Polizia sclarescha ussa las circumstanzias dil accident. (trr/fmr)